

**Ingerlatseqatigiiffiit akileraarutaata 20 procentimut apparneqarnissaanik Naalackersuisut peqquneqarnissaannik Inatsisartut aalajangiiffigisassaattut siunnersuut. Appaaneq ulloq 1. januar 2025 atuutilissaaq.**

(Inatsisartunut ilaasortaq Jens-Frederik Nielsen, Demokraatit)

**Akissuteqaat**

(Aningaasaqarnermut Akileraartarnermullu Naalackersuisoq)

**Siullermeerinnineq**

Naalackersuisut sinnerlugit siunnersuuteqartoq aalajangiiffigisassatut siunnersuutaanut qutsavigaara.

Inuussutissarsiortut akileraarusiivigineqartarnerisa aaqqissuuteqqinnissaata pingaarutaa isumaqatigilluinnarpaat. Akileraartarneq pillugu isumaqatigiisummi aaqqissuusseqqinnissamut siunnerfik 5-imi "Nunarput najoruminarnerulersitsigu"-mut atatillugu Naalackersuisut aaqqissuusseqqinnernut taamaattunut tigussaasunik pilersaaruteqarput.

Sulinermi tassani partiit kissaataannik ilanngussinissamut Naalackersuisut ammasorujussuupput, inuussutissarsiortunullu akileraarusiisarnermik aaqqissuusseqqinnermik oqimaaqatigiisumik politikikkut atituumik isumaqatigiisuteqarnissaaq sulissutigisavaat. Naalackersuisuttaaq ingerlatseqatigiiffinnut akileraarusiisarnernup qaffasissusaata eqqarsaatigeqqinnissaa isumaqatigaat, peqatigisaanillu tamakkiisumik isiginnittumik sulinissaaq pingaartillugu. Siunnersuutit ataasiakkaat politikikkut anguniakkanut isumaqatigiisutigisatsinnut pitsaanerpaamik siuarsaasinnaanerannik oqimaalutarneqartariaqarput.

Ingerlatseqatigiiffinnut akileraarummik appaaneq sunniuteqarnerpaanersoq qularnaagaangilaq. Akileraarusiinernik oqilisaaneq suliffeqarfinnut aallarlerlaanut sanilliullugu ingerlatseqatigiiffinnut anginernut ingerlalluartunullu iluaqutsiinerusarpoq. Immikkoortunillu amerlasuunik, soorlu allaffissornikkut oqilisaanernik imaluunniit kinguaariit nikinnissaanut periarfissat pitsaanerunik, siunissami siuariartornissami ilapittuilluarsinnaanerusunik peqarpoq. Inuussutissarsiornermi akileraarusiisarnermik aaqqissuusseqqinnermi suliffeqarfiit minnerusut nunaqavissullu siuarsarnissaat anguniakkat ilagaat. Tassunga tunngatillugu namminersorlutik inuussutissarsiortut aaqqissuusseqqinnermik suliaqarnermut akuutinnissaat, taamaalillunilu ajornartorsiutinik aaqqissugaasinnaasunillu tikkuusseqataanissaat annertuumik pingaaruteqarpoq.

Aaqqissuusseqqinnerup aningaasaqarnikkut oqimaaqatigiittup suliarineqarnissaa pingaaruteqartoq, Naalackersuisut ilanngullugu isumaqarput.

Aalajangiiffigisassatut siunnersuummi ingerlatseqatigiiffinnut akileraarummik appaanermi aningaasatigut kinguneqaatissat 10,2 mio. kr.-nut pisortanut naleqartussatut naatsorsorneqarput. Immikkoortup matuma saniatigut siunnersuuteqartoq aamma aalajangiiffigisassatut siunnersuummik allamik, immikkoortoq 111-mik, una assigalugu Nunatta Karsianit aningaasanik atugassaagaluanik matussuserneqartussamik saqqummiussivoq.

Aningaasat atugassat siornatigutut annertussuseqarunnaarnerat erseqqissaatigineqassaaq. Aningasaqarnikkut akisussaassuseqartumik inuuniarnikkullu oqimaaqatigiisumik akileraartarnermik aaqqissuusseqqinneq, ataatsimiinnermi matumani immikkoortoq 13-imi suliarineqartussaq, aningaasanik atugassanik annertuumik annikinnerulersitsivoq. Siunnersuuteqartup aalajangiiffigisassatut siunnersuutaanik marlunnik piviusunngortitsineq, ukiuni 4-ni katillugit 540 mio. kr.-nik iluanaarutit apparnerannik kinguneqassaaq.

Naggasiullugu aalajangiiffigisassatut siunnersuummi saqqummiunneqartumi ajornartorsiutit pilersussat erseqqissarneqassapput.

Aalajangiiffigisassatut siunnersuummi Naalackersuisut allannguinermik ingerlannissaanut Naalackersuisut piginnaatitaaffiginngisaannik, taamaammallu aamma Inatsisartunut peqqussutigineqartariaqanngitsumik peqqusivoq. Inatsisartut aningaasarsianit akileraarutit pillugit Inatsisartut inatsissaanni § 60-imi ingerlatseqatigiiffinnut akileraarummik procentimik aalajangersaapput.

Aalajangiiffigisassatut siunnersuutip imarisaa malillugu, ingerlatseqatigiiffinnut akileraarut ulloq 1. januar 2025-mi atuutilersinneqassaaq. Aappassaaneerinninnissarli aatsaat ulloq 18. februar 2025 pisussanngortillugu pilersaarutigineqarpoq. Aalajangiiffigisassatut siunnersuummik akuersineq taamaalilluni inatsimmik allannguinerup kingumoortumik atuutilernissaanik tungavissaqartinneqassaaq, tamannalu akileraartarnermi pissusissamisuunngilaq.

Ingerlatseqatigiiffinnut akileraarummik taama annertussusilimmik appaaneq, Danmarkip Kalaallilu Nunaata akornanni marloqiusamik akileraannginnissamik isumaqatigiissutip ilaanik isumaqatiginninniaqqinnissamik Danmarkip piumasaqalerneranik kinguneqarsinnaasoq ilimagisariaqartoq, naggasiullugu oqaatigineqassaaq. Taamatut isumaqatiginninniaqqinnermi Kalaallit Nunaata qallunaanut aningaasaliisartunut iluanaarutimik akilerneqartunik akileraarusiisinnaaneramik appartitsissasoq naatsorsuutigineqassaaq. Ullumikkut Kalaallit Nunaata akileraarusiisinnaatitaanera 35 procentiuvoq, akerlianillu Danmarkip pisup assingani akileraarusiisinnaatitaanera 0-iuvoq 15 procentiulluniluunniit. Kalaallit Nunaanni ingerlatseqatigiiffiit iluanaarutimik akiliisut aallaavittut iluanaarutimik akiliutimik ilanngaateqarsinnaatitaapput, akerlianillu Danmarkimi ingerlatseqatigiiffiit aallaavittut ingerlatseqatigiiffinnut akileraarummik akileereernerminni sinneqartoorutiminnit iluanaarutissiisarnerat tassani assigiinngissutaavoq. Appaanissamik siunnersuutigineqartumi iluanaarutitigut sunniutit pitsaanngitsut taamaalillutik aalajangiiffigisassatut siunnersuummi allassimasunit annertunerugunarput.

Naalackersuisut inuussutissarsiornermut akileraartarnermik aaqqissuusseqqilereermata, tamatumani ineriartornermik aamma suliffeqarnermik siuarsaasussamik kiisalu suliffeqarfinnut minnernut piffinniittunullu allaffissornikkut pisariillisaasussamik, aalajangiiffigisassatut siunnersuut itigartinneqassasoq inassutigaarput.